



Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allanngortinneqarnera pillugu Inatsisartut inatsisissaattut siunnersuut (Nunap immikkoortuini akitigut naligiissaarisoqarnissaanut aamma ajunaalernermi isumannaallisaanikkullu sullissiffiusut annertusineqarnissaanut akuersissummik pigisaqartumut peqqusinissamut tunngavissaq)

(Ineqarnermut Attaveqaasersuutinullu Naalakkersuisoq)

(Siullermeerneqarnera)

Qujanaq Naalakkersuisut siunnersuummut.

Demokraatinut pingaartuuvoq, kalaallit tamarmik nalunaarasuartaatinut, akilersinnaasaminnik atuisinnaassasut. Tamanna sumiluunniit najugaqaraluaaraanni. Tamanna tunngavigalugu isumaqataavugut, allatut ajornartumik sumi inissisimaneq aallaavigalugu akinik assigiissaarisoqartariaqartoq, pisortat pigisaannut nalunaarasuartaatileqatigiiffimmut Tusass A/S-imut tunngatillugu.

Sunali tamaat misissortariaqarparput isumaqaratta, periarfissaqartoq nalunaarasuartaatitigut kiffartuussinerinik akikinnerusunik tuniniaanissamut sumi inissisimaneq aallaavigalugu akinik assigiissaarinissaq isumaqatigiinngissutiginnikkaluarlugu.

Siullermik aallarniutigisinnaavarput Tusass A/S pinngitsaalillugu sinneqartoorutaanniit annertooujussuarmik Namminersorlutik Oqartussanut akiliisittarunnaarlugu. Akerlianik Namminersorlutik Oqartussat piginnittutut Tusass A/S pisussaaffilersinnaavaat aningaasat taakku internet-ip oqarasuaateqarnerullu akiinut akikillisaatit atoqqullugit.

Aappaattut aalajangersinnaavarput, killilersugaannginnerusumik nalinginnaasumillu unammillerfiusumik pilersitsinissarput, Tusass A/S saniatigut tuniniaasut allat pisiassanik neqeroorsinnaanngorlugit innuttaasunut nuannaarutaasumik. Taassuma kingunerissagaluarpaa, kalaallit unammillerfiusumi najugaqartut allamik akikinnerusumillu sullissisussamik toqqaasinnaallutik pisortanit pigineqartumit Tusass A/S-imit. Taamatuttaarlu kalaallit unammillerfiunngitsumi najugaqartut naammaginantumik akilinnik soorlu uuma inatsisissatut siunnersuutip sumi inissisimaneq aallaaviginagu Tusass A/S-ip tuniniagaasa akiisa naligiinnerulersinnissaannik malitseqartussamik.

Siunnersuut taamatut oqaaseqaatitalerlugu Sanaartornermut ataatsimiititaliamut suliareqqitassanngorlugu innersuunneqarpoq.